

Zeitschrift: Baselbieter Heimatblätter
Herausgeber: Gesellschaft für Regionale Kulturgeschichte Baselland
Band: 44 (1979)
Heft: 2-3

Artikel: Der Köbi
Autor: Moser, Martha
DOI: <https://doi.org/10.5169/seals-859228>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 04.05.2026

ETH-Bibliothek Zürich, E-Periodica, <https://www.e-periodica.ch>

- 10 Bodenzins-Berein, Gemeindearchiv Ziefen.
- 11 Paul Suter, Das schöne Baselbiet, Heft 10, Baudenkmäler im Hinteren Frenkental, 1973, S. 43.
- 12 Staatsarchiv Liestal.
- 13 Staatsarchiv Liestal, 388.
- 14 Daniel Bruckner, Merkwürdigkeiten der Landschaft Basel, Basel, 1756, S. 1717.
- 15 Fertigungen, Gemeindearchiv Ziefen.
Markus Lutz, Neue Merkwürdigkeiten, Basel 1805, erwähnt die «beyden beträchtlichen Meyerhöfe Kohlmatt und Fraumatt» in Ziefen. Siehe auch BZ Nr. 178 vom 2. August 1977 (mit Bild).

Der Köbi

Von *Martha Moser*

Grad wiene Baum, wo bime Summerwitter unerwartet vom Blitz troffe und für alli Zytte in sym Wachstum verändertet und gstört wird, so ischs im Köbi gange bimene Unfall uf der Strooss.

Dryssg Johr lang isch der Köbi die glychi Strecki gfahre mit im Vello, uf d Arbet, ohni einisch umzgheie. Jetzt ischs passiert. Agfahre worden isch er vome Autofahrer, ufs Trottwar ufe gschleuderet und dort blybe ligge.

Siderhär isch im Köbi sy Wält ufe Chopf gstellt. Uusegrisse usim gwohnte Tramp, ischs im schwer gfalle der Rank zfinde. D Chnochebrüch sy gheilt, d Wunde verwachse, aber der Unfall sälber unverdaut. Vo hinden agfahre wärde und denn sell me no sälber tschuld sy? Und s Chopfweh isch blibe; der Schwindel au. Beides fällt allewyl wider über in här und lot im kei Rue. Schaffe darf er nonig. Er hockt dehei und grüblet. E Prozäss lauft wäge dem Unfall. Au das no! Do sell me derby bim Verstand blybe! —

Der Köbi läbt ellei in ere Zweuzimmerwohng, ohni Frau, scho lang, gschide. Aber sy Huushaltig darf sech lo zeige. Keis Stäubli, kei Grümpel. Ueberal Ornig. Au jetze. Nei, jetzt erscht rächt, wil er so vill Zyt het. Er luegt zue de Meiestöck wiene Vatter. Si zittere, wenn d Laschtwäge uf der Strooss unde fahre, und der Köbi, wenn er das merkt, zitteret mit. Ufe Briefträger wartet er alli Tag. Ufe Bricht vom Prozäss. S goht lang, vill zlang.

Mängisch hockt der Köbi am Rhy unde und grüblet, stieret ins Wasser, ass im schwindlig wird. Weers ächt nit besser zverschwinde, für allewyl? Aber der Gwunder haltet in dervo ab, im Ruusche vom Wasser zfolge, wo sait: «Chumm mit, chumm mit!» Der Gwunder, wie dä Prozäss wärd uusgoh, bhaltet in no uf der Wält. Verliere will er uf kei Fall. Dene will ärs scho zeige.

Dehome grümplet er einisch in der Kummode. Es Schächteli findet er derby, wo no der Mueter ghört het. Dort drin hets Briefe vo Verwandte, Adrässe. Hejo, do isch die vo der Gusyne im Tessin, won er no nie gseh

het. Si sell es Hüüsli ha imene Räbbärg. Der Vatter isch Lokifüerer gsi bi der Bahn und isch dört abe go wohne. D Gusyne isch jetz au elleige, grad wien är. Sell i oder sell i nit? Er wärweiset hin und här, luegt die Bildli a, wo bi der Adrässe sy. Heillos schön.

Der Köbi het sit syner Scheidig en Aberwille gegen alli Frauezimmer. «Uuf und dervo isch si mer und het en andere Trottel ghürote», brummllet er bisig vor sech ane.

Er lot die Bildli vom Räbehüüsli im Tessin uf im Chuchitisch ligge, überschloft die Sach nonemol.

Am andere Tag schrybt er der Gusyne ins Tessin e Brief, e ganz e churze. Er frogt, öb er ächt emol dörfti cho, uf Bsuech, er hätt jetz der Zyt wägem Unfall. D Wuche druuf isch d Yladig do gsi. Er sell cho und blybe so lang er well. S geeb allewyl öppis ztue um s Huus umme, si weeri grad froh über e Bsuech, wo chönnti e chly Hand alege.

Der Köbi het gstuunt. So unkumpliziert isch die Rosa. S wird im jetz schwindlig vor Freud, er chunnt Chopfweh über vor Uufregig. Er mues sy plogte Chopf in beed Händ neh und fescht hebe, d Ellbögen uf im Tisch.

Drüberabe lauft er ufe Bahnhof und chaufft e Billje Lugano und zugg. Me weiss doch nie. Er will uufpasse und die Gusyne go aluege. Ohni sech bine-re zmälde stoht er ame schöne Tag im Tessin und will bi der Rosa s Gartetürli uuftue. Aber oha lätz, do bällt eine und lot in nit d Falle alänge. Aber d Rosa isch im Garte, in der Lotscha sitzt si und macht Bohnen ab.

«Tschesare, was isch los, chumm sofort do ane!» Der Hund springt zwüsche der Rosa und im Köbi hin und här. Us sym Bälle chasch merke, ass er däm fremde Ma nit trout. Jetz isch s Stuune an der Rosa. Dasch also der Köbi, der Vetter! Si git im d Hand und wyst im e Stuel a.

D Obesunne strahlt und leit das Hüüsli im Räbbärg in es bsunders Liecht. D Rosa bringt es Chrüegli Noschtrano, Brot und Salami. Si sitze zäme bis d Sterne schyne, vorusse.

Der Köbi isch e Wuche blibe. Denn isch er heigfahre. Aber s gfallt im nimm in der Stadtwohng. Der Entschluss isch gly gfasst. Er chaufft es Gäneralabonnemänt uf Lugano. Wenns im do verleidet isch, so haut ers ab ins Tessin, zu der Rosa.

Er chunnt egetli numme no hei für der Briefchaschte zleere. Er wartet allewyl no uf Poscht. Vom Prozäss. S isch es langs Warte. Aber er regt si nümme so uuf derwäge. Nümme so wie am Afang.

Sit as d Rosa d Hand uf sy Chopf leit, wenn das bös Chopfweh und der Schwindel in tüen überfalle, isch d Wält häller worde.

Jä, im Köbi ischs uufgange, ass villicht das alles, won im passiert isch, nit umesunscht het müese oder dörfe sy.